

Powšitkowne WOZJEWJENJA

njedźelu, 13. oktobra 2024

TCM prosy za wopory powodźenja w Pólskej

Dwě wosadže w Pólskej, kotrež stej wot powodźenja jara sylnje potrjechenej, chce Towarstwo Cyrila a Metoda z.t. (TCM) ze swojej akciju „Łužica pomha“ podpěrać. Kontakt k nim nawjaza wone přez swojeho kruteho partnera w susodnym kraju, prelata dr. Dariusza Kruczyńskeho. Wón ma jako direktor Charity w Ełku zwisk k direktoram druhich biskopstwow a je tak zhonił, kak móhli we wosadomaj Ustroń Śląski a Głuchołazy najlěpje pomhać. Trjebaja tam předewšěm elektriske nastroje, kotrež buchu dospołnje zničene, na přikład chlódžaki a płokawy. Wón na to skedźbnja, zo su předewšěm seniorojo wot podpěry wotwisni. Štóz chcył wot powodźenja domapytanu ludnosć podpěrać, njech přepokaza pjenjezy na konto TCM: Cyrill-Methodius-Verein e.V., IBAN: DE 65 7509 0300 0008 2823 66, hesło: „wulka woda“. Štóz sej darowansku kwitowanku přeje, měł swoju adresu podać, pak telefonisce pod čisłom (0 35 91) 55 02 10 pak z mailku na TCM@Posol.de.

Mandźelskej seminaraj

Seminaraj k přihoťej na sakrament mandźelstwa wotmějetej so klětu stajnje pjatk a sobotu, 7. a 8. februara kaž tež 28. a 29. nowembra, w Smochčanskim kubłanišću swjateho Bena. Přizjewjenja přijimuje dekanatne dušepastyrstwo młodžiny we Worklecach hač do srjedy, 8. januara, online. Link je pod www.posol.de podaty.

Podpěru za projekty prawje požadać

Norman Reitner z Drježdžanskeho biskopskeho ordinariata poskićuje na próstwu Towarstwa Cyrila a Metoda z.t. (TCM) kurs, kak móžeš projekty derje planować a k tomu na wšelakore wašnje pjenjezy požadać. Dalekubłanje na polu sponsoringa a fundraisinga wotměje so sobotu, 9. nowembra, wot 9.00 do 16.00 hodź. na „Radlubinje“ w Ralbicach. Wobdźělic smě so maksimalnje 30 wosobow. By-li zajim wjetši był, by so TCM wo dalše zarjadowanje prócowalo. Jědź a napoje budu přihotowane. Zajimcy – nimo člonow TCM su tež dalši přeprošeni – měli so online přizjewić. Link na to je pod www.posol.de podaty.

Prěnjowoprawjenske džěci přeprošene

Dekanatne dušepastyrstwo přeprošuje wšitke džěci, kotrež so na přenje swjate woprawjenje přihotuja, na zhromadny dzeń srjedu, 20. nowembra, wot 9.00 do 15.00 hodź. do Njebjelčic. Započatk je z Božej mšu w cyrkwi. Zajimcy njech so hač do pónđzele, 21. oktobra, online přizjewja. Link je pod www.posol.de podaty. Za wudawki dnja zběraja wot kóždého wobdźělnika přinošk pjeć eurow.

Duchowna hudźba

Budyska Katolska tachantska wosada a Towarstwo tachantska hudźba přeprošujetej wšitkich zajimcow na nyšpor duchowneje hudźby do tamnišeje tachantskeje cyrkwy. Na nim předstajitej njedźelu, 20. oktobra, we 18.00 hodź. hudźbny duo Enšle-Lamprecht ze Salzburga a Weimara kaž tež Susanne Ansong jako hósć „Nikodemusowy pasion“. Zastup je darmotny. Po tym budže kolekta. Link k dalšim informacijam je pod www.posol.de podaty.

Na informaciski wječor do dnjoweje hladarnje

Dnjowa hladarnja Charity „Při Krabatowym puću“ we Worklecach přeprošuje wšitkich zajimcow na informaciski wječor wo staračelskim społnomócnjenju (Vorsorgevollmacht) a postajenju pacienta (Patientenverfügung). Tón budže wutoru, 15. oktobra, we 18.00 hodž. w rumnosćach dnjoweje hladarnje. Přednošowac budže Tomaš Pěčka z ambulantneje hospicneje a paliatiwneje poradźowanskeje služby Hornjołužiskeho zwjazka Charity z.t.

Samotnosć jako tema přednoška a rozmołwy

Wo problematice samotnosće budže psychologa Raphael Schütz z Braniborskeje Technische uniwersity w Choćebuzu štwórtk, 24. oktobra, we 18.30 hodž. w Šěrachowskej wosadnicy, Am Kirchberg 4, přednošowac. Tež potrjechena wosoba wo swojich nazhonjenjach porěči. Hornjołužiske telefonowe dušepastyrstwo jako zarjadowar přeprošuje k tomu zajimcow, potrjechenych a přiwuznych, zo bychu wjace wo temje zhonili, kotraž je w towaršnosći husto tabuizowana.

Nowy termin za přěni džěl přichodneho kursa JuLeiCa

Přěni džěl přichodneho wukubłanja JuLeiCa, kotrež poskići Worklečanske dekanatne dušepastyrstwo za młodžinu, njebudže kaž dotal připowědžene klětu w januarje, ale hakle wot pjatka do njedžele, 4. do 6. apryla, w Smochčanskim kubłanišću swjateho Bena. Druhi džěl wotměje so, kaž planowane, wot 25. do 27. apryla na samsnym městnje. Wobaj terminaj stej z přenocowanjom a połnym zastaranjom. Zajimcy maja zdobom dopokazać, zo su so na kursu přěnjeje pomocy wobdźělili. Tajki přewjedu sobotu, 15. měrca, we Worklečanskim Don Boskowym domje. Za wobdźělnikow kursa JuLeiCa je wón darmotny. Certifikat služi tež jako dopokaz za jězbnu šulu. Přizjewjenja za wšitke tři terminy su hač do srjedy, 8. januara, online móžne. Link na wotpowědnu stronu je pod www.posol.de podaty.

Na sinfoniski koncert do Budyšina

Twórby serbskeju komponistow Jurja Pilka a Bjarnata Krawca steja w srjedzišću 1. sinfoniskeho koncerta Budyskeho Serbskeho ludoweho ansambla (SLA) njedželu, 20. oktobra, w 17.00 hodž. na tamnišej žurli. Mjez druhim zaklinča kompozicija Jurja Pilka pod titulom „Elegija“ kaž tež „Šěsć serbskich rejow za sinfoniski orchester op. 77 c“ Bjarnata Krawca. Na kóncu koncerta diriguje nowa nawodnica orchestra SLA Katharina Dickopf „Sinfoniske reje op. 45“ ruskeho komponista Sergeja Rachmaninowa. Wšitcy zajimcy su wutrobnje přeprošeni. Zastupne lisćiki za koncert móža sej zajimcy w SLA abo online kupić. Wotpowědny link je pod www.posol.de podaty.

Wohnjowi wobornicy do Čěskeje přeprošeni

Předsyda čěskeho Zjednoćenstwa swjateho Floriana Josef Bis a farar Jakub Polívka přeprošujetaj serbskich wohnjowych wobornikow na mjezynarodne putnikowanje z Božej mšu na čěsć jich patrona, swjateho Floriana. Kemše budu sobotu, 9. nowembra, w 10.00 hodž. w cyrkwi swjateje Katyrny w Horním Rovenju. Tam wotkryja nimo toho pomjatne městno čěskeho wohnjoweho wobornistwa. Patronat je čěski ratarski minister Marek Výborný přewzał. Štóz so wobdźěli, měł w swojej uniformje přińć. Zajimowane wohnjowe wobory měli so hač do srjedy, 30. oktobra, pod adresu asociace.svateho.floriana@seznam.cz přizjewić.

Serbske kemše w Drježdžanach

Drježdžanscy Serbja su na maćernorěčnu Božu mšu njedželu, 27. oktobra, w 16.00 hodž. do cyrkwe swjateho Antonija na Bünauskej 10 přeprošeni. Kemše swjeći farar Gabriš Nawka. Přizamknje so bjesada.

Filmowy wječork w ekumeniskim wobchodźe

Na předstajenje filma „The Quiet Girl“ póndźelu, 21. oktobra, w 19.00 hodź. přeprašuje Budyski Ekumeniski tachantski wobchod do swojich rumnosćow Při mjasowych jětkach w Budyšinje. „The Quiet Girl“ (Ćicha holca) je filmowa drama Colma Bairéada, kotraž swjećeše w februaru 2022 we wobłuku Berlinskich filmowych swjedženskich hrow swoju premjeru a bu jako přeni irskorěčny film za „Oscar“ nominowana.

Putnikowanje do Krupki

Pěše putnikowanje młodostnych do Krupki wotměje so klětu wot njedźele do pjatka, 20. do 25. julija. Putniske kemše budu srjedu, 23. julija, w 10.00 hodź.